



CONCELLO DE BEGONTE

REGULAMENTO DA AGRUPACIÓN DE VOLUNTARIOS DE PROTECCIÓN CIVIL DE BEGONTE

INTRODUCCIÓN

En orde á realización de actividades diversas para a Protección Civil en situacións de emerxencias, os Concellos e os Alcaldes teñen atribuídas competencias en materia de Protección Civil, segundo o establecido no artigo 25.2 c) e 26.1c) da Lei 7/85, de 2 de abril, Regulamentadora das Bases de Réxime Local e artigos 80, 81 e 82 da Lei 5/1997, do 22 de xullo, da Administración Local de Galicia.

O exercicio destas competencias levarase a cabo, fundamentalmente, mediante actuacións dos Concellos e dos Alcaldes coa colaboración dun Concelleiro Delegado de Protección Civil, así como coa intervención coordinada dos servizos municipais dedicados, de modo ordinario e permanente, ao cumprimento de fins coincidentes coas necesidades derivadas das situacións de emerxencia nos casos de grave risco, catástrofe ou calamidade pública.

Así mesmo, nos números 3 e 4 do artigo 30 da Constitución Española, determínase que poderá crearse un Servizo Civil para o cumprimento dos fins de interese xeral e que mediante Lei regularanse os deberes dos cidadáns nos casos de grave risco, catástrofe ou calamidade pública, polo que parece necesario que, sen prexuízo do establecido na lexislación regulamentadora do Servizo Civil e da Protección Civil sobre canto antecede, se complementen os recursos municipais mencionados, coa incorporación dos cidadáns ás actividades que desenvolva a Protección Civil Municipal, ofrecéndolles así oportunidades para asumir e realizar, voluntariamente, o cumprimento dos deberes que a Constitución lles atribúe nas circunstancias aludidas anteriormente.

Por outra banda a Lei 2/1985, de 21 de xaneiro, sobre Protección Civil e o Real Decreto 407/1992 que desenvolve a Norma Básica, en distintas partes do seu articulado, recolle a participación, responsabilidade e competencias das diferentes Administracións Públicas na Protección Civil, tendo un papel importante, os Concellos, que por sela administración máis cercana aos cidadáns, convértese na célula básica de Protección Civil sendo a primeira en intervir en cantas emerxencias ocorran.

Abondando na normativa, temos que recolle-lo establecido no Decreto 56/2000, do 2 de marzo, e no Plan Territorial de Protección Civil na Comunidade Autónoma de Galicia (PLATERGA),



CONCELLO DE BEGONTE

recollido como Anexo do citado Decreto, onde se establece, entre outras, as directrices para a planificación de ámbito local, así como os cometidos que poden desenvolver as Agrupacións de Voluntarios no estudio e desenvolvemento dos distintos Plans de Emerxencia.

Para articular as oportunidades de colaboración dos cidadáns, individualmente considerados, coa Protección Civil Municipal, parece conveniente regular a organización e funcionamento da Agrupación de Voluntarios de Protección Civil deste Concello, que se vinculará aos servizos básicos de intervención en emerxencias dependentes do Concello para realizar as tarefas que procedan, sen prexuízo do que poda establecerse nas leis sobre prestación persoal e de servizos con carácter obrigatorio.

En virtude do exposto e previo acordo do Concello, apróbase o Regulamento da Agrupación de Voluntarios de Protección Civil deste Concello, que se transcribe seguidamente.

CAPÍTULO I

FINALIDADE

Artigo 1º.-

A Protección Civil Municipal ten como fin, establecer unha organización en base aos recursos municipais, contando coa colaboración das entidades privadas e dos cidadáns, para garantir a coordinación preventiva e operativa respecto da protección de persoas e bens ante os danos producidos polas situacións de emerxencia nos casos de grave risco, catástrofe ou calamidade pública, sen esquecer todo tipo de emerxencias menores, mediante a realización de actividades que permitan evitar as mesmas, reducir os seus efectos, reparar os danos e, no seu caso, contribuir a corrixi-las causas produtoras dos mesmos.

Artigo 2º.-

A organización e funcionamento da Agrupación de Voluntarios de Protección Civil, en diante A.V. P.C. como modalidade de incorporación dos cidadáns ás actividades de Protección Civil, rexerase polo establecido no presente Regulamento, así como polas instrucións e directrices que, a efectos de coordinación xeral e participación no desenvolvemento ou execución dos plans, programas ou actividades no sistema autonómico de Protección Civil sexan ditados polo órgano da Comunidade Autónoma competente nesta materia, e demais Administracións Públicas de ámbito superior conforme se establece na Norma Básica de Protección Civil.



CONCELLO DE BEGONTE

Artigo 3º.-

Poderán vincularse á Agrupación de Voluntarios de Protección Civil unicamente as persoas físicas ou individuais que residan habitualmente no Concello e teñan interese en colaborar directamente nas actividades propias dos servizos básicos de Protección Civil dependentes dos mesmos.

Artigo 4º.-

Asemade, a actividade voluntaria dos interesados é independente da obriga que como veciños puidera corresponderlles, ou outras prestacións que poidan establecer leis especiais, como a de Incendios Forestais vixente ou as que regulen, no seu día, a Protección Civil e o Servizo Civil.

CAPÍTULO II

ORGANIZACIÓN

Artigo 5º.-

A colaboración voluntaria dos veciños e Protección Civil Municipal é por tempo determinado e levarase a cabo mediante a incorporación dos mesmos á Agrupación de Voluntarios de Protección Civil á que se refire o presente Regulamento.

Artigo 6º.-

A Agrupación Municipal dependerán directamente do Alcalde, que poderá delega-lo exercicio das súas funcións e competencias no Concelleiro Delegado de Protección Civil. Nembargante, a Agrupación encadrarase, orgánica e funcionalmente, nunha Unidade Municipal que terá o seu enderezo na Casa do Concello de BEGONTE.

Artigo 7º.-

A vinculación dos voluntarios co Concello non ten o carácter de relación laboral ou administrativa, se non soamente de colaboración voluntaria par a prestación de servizos de xeito gratuíto e altruísta, como medio de realización de accións humanitarias e de solidarizade social que constitúen o fundamento das relacións de boa vecindade.

Artigo 8º.-

Poderán incorporarse á Agrupación de Voluntarios de Protección Civil, como colaboradores en misións de orientación, asesoramento e asistencia técnica, os veciños con formación e experiencia suficiente no exercicio profesional ou vocación relacionada con algunha das entidades deste servizo público.



CONCELLO DE BEGONTE

Asemade, poderán incorporarse á Agrupación como voluntarios activos, tódolos veciños maiores de 18 – ou maiores de 16 co consentimento do pai, nai ou titor legal - e menores de 65 anos que acrediten dispoñer de tempo libre determinado e que superen as probas de aptitude psicofísica e de coñecementos que se determinen, así como as de formación básica e especialización que procedan.

Artigo 9º.-

A incorporación á agrupación farase sempre en virtude de solicitude do interesado, acompañada dunha declaración de non atoparse inhabilitado para funcións públicas por sentenza firme, e de compromiso de honor de coñecer e acepta-lo contido deste Regulamento, así como do disposto na normativa vixente sobre Protección Civil e de executa-las tarefas que se lle encomenden polas autoridades competentes ou ben os seus delegados e axentes.

Artigo 10º.-

A condición de membro da Agrupación de Voluntarios de Protección Civil faculta unicamente para realiza-las activades correspondentes á mesma en relación e prevención con situacións de emerxencia nos casos de grave risco, catástrofe ou calamidade pública. Os compoñentes da agrupación non poderán realizar, amparándose na mesma, xa sexa en relación cos mandos dela ou entre as persoas, actividades de carácter persoal ou de finalidade relixiosa, política ou sindical.

Artigo 11º.-

A Agrupación estruturarase, orgánica e funcionalmente, e en razón aos efectivos que existan a disposición da mesma, en diferentes grupos operativos, ao fronte dos que deberá estar sempre un Xefe de Agrupación.

Artigo 12º.-

O Xefe da Agrupación Municipal será designado polo Alcalde- Presidente, a proposta da Asemblea de voluntarios.

Artigo 13º.-

Tódolos compoñentes da Agrupación ostentarán, sobre o lado esquerdo do peito, o distintivo de Protección Civil da Comunidade Autónoma.



CONCELLO DE BEGONTE

Artigo 14º.-

Polo Servizo de Protección Civil elabóranse e formularanse propostas para a aprobación das normas de carácter especial ou xeral que sexan necesarias par ao desenrolo e aplicación deste Regulamento, así como para regulación de actividades da Agrupación de Voluntarios de Protección Civil.

A aprobación das normas xerais ou específicas corresponderalle ó Concelleiro Delegado de Protección Civil e ao funcionario con funcións equivalentes ou polo Alcalde- Presidente directamente cando o estime procedente.

Con independencia das normas aludidas aprobaranse, editaranse e distribuiranse os manuais de actuación que procedan.

CAPÍTULO III

FORMACIÓN E PERFECCIONAMENTO

Artigo 15º.-

A formación terá como finalidade a orientación dos aspirantes a membros da Agrupación de Voluntarios de Protección Civil sobre os coñecementos básicos relacionados coa caracterización deste Servizo Público, así como contribuír á selección dos que proceda e facilita-la capacitación destes para incorporarse en condicións de eficacia á correspondente unidade de intervención.

Artigo 16º.-

A actividade formativa articularase do seguinte xeito:

- a) Cursillo de orientación de aspirantes ao Voluntariado de Protección Civil.
- b) Cursos de formación básica dos aspirantes seleccionados para incorporarse á Agrupación.
- c) Cursos de perfeccionamento para os voluntarios pertencentes á Agrupación.
- d) Exercicios prácticos con carácter periódico para a mellora permanente da preparación dos compoñentes da Agrupación.

Os cursos terán un contido teórico- práctico determinado de conformidade coa normativa.

Ademais de canto antecede, a activade formativa completarase coas seguintes actividades:

- a) A organización de bibliotecas e fondos de comunicación sobre Protección Civil e, especialmente, en relación coa organización e funcionamento de Agrupacións de



CONCELLO DE BEGONTE

Colaboradores de Voluntarios e outras modalidades da participación cidadán nas actividades de Protección Civil.

- b) O mantemento de relacións de colaboración mutua con outras Administracións Públicas ou entidades privadas relacionadas coa Protección Civil.
- c) A elaboración e edición e, no seu caso, promoción de publicacións periódicas e unitarias sobre temas de Protección Civil, e especialmente, as destinadas á formación de voluntarios e á divulgación de recomendacións á poboación sobre factores de risco potencias de emerxencia e comportamento perante os mesmos.

CAPITULO IV

DEREITOS E OBRIGAS

Artigo 17º.-

O voluntario de Protección Civil ten dereito a usa-los emblemas, distintivos e equipos do Servizo, en tódolos actos públicos a que sexan requiridos sendo obrigatorio o seu uso en casos de intervención especial, sinistros ou calamidades, a efectos de identificación.

Artigo 18º.-

Asemade, teñen dereito a eleva-las súas peticións, suxerencias e reclamacións ao Alcalde-Presidente, Concelleiro- Delegado de Protección Civil, ou ao funcionario equivalente, a través dos seus mandos naturais ou directamente cando, no prazo de vinte días, o seu escrito non fose respostado.

Artigo 19º.-

Os riscos no servizo do voluntario estarán cubertos por un seguro de accidentes para aqueles que puideran sobrevirle perante a súa actuación, abarcando indemnizacións por diminución física, invalidez temporal ou permanente, finamento e asistencia médico- farmacéutica.

Os danos e prexuízos que poida causar un compoñente da Agrupación nas súas actuacións, estarán cubertos por un seguro de Responsabilidade Civil. Nembargante, o Concello, segundo o previsto na Lei 30/92 do 26 de novembro de mil noventa e dous do Réxime Xurídico e das Administracións Públicas e do Procedemento Administrativo Común, responderá patrimonialmente nos supostos e requisitos nela contemplados.

A modalidade das correspondentes pólizas de seguros e contías das indemnizacións serán fixadas polo Concello a proposta do Concelleiro Delegado.



CONCELLO DE BEGONTE

Artigo 20º.-

Todo voluntario de Protección Civil obrígase a cumprir estritamente os seus deberes regulamentarios, cubrir un mínimo de sesenta horas anuais, cooperar co seu maior esforzo, interese, disciplina e espírito social en calquera misión de socorro, axuda e rescate de vítimas, da súa evacuación, asistencia, vixilancia e protección das persoas e bens, así como en toda outra misión que lle encomenden os mandos da organización ou as autoridades de quén dependa perante a súa actuación.

Artigo 21º.-

O voluntario deberá incorporarse, á maior brevidade posible, ao seu lugar de concentración en caso de catástrofe ou emerxencia.

Asemade, terá a obriga de poñer en coñecemento dos mandos da Agrupación ou autoridades, a existencia de feitos que poidan supoñer riscos para as persoas ou os bens.

Artigo 22º.-

En ningún caso o voluntario ou o colaborador actuarán como membros de Protección Civil fora dos actos de Servizo. Nembargante, usando os seus coñecementos e experiencias, poderá intervir, con carácter estritamente particular, naqueles feitos requiridos polo seu deber de cidadanía.

Artigo 23º.-

A pertenza dos voluntarios e colaboradores ao Servizo Municipal de Protección Civil será gratuíta e honorífica, sen dereito a reclamar ao Concello retribución nin premio algún, agás as indemnizacións por accidente que puideran corresponderlle, de acordo co especificado no artigo 19º.

Artigo 24º.-

O voluntario ten a obriga de manter en perfectas condicións de uso o material e equipo que puidera serlle confiado, comprometéndose a abona-los danos que causara nos mesmos ao maltrato ou falta de coidado.



CONCELLO DE BEGONTE

CAPITULO V

RECOMPENSAS E SANCIÓNS

Artigo 25º.-

As condutas dos compoñentes da Agrupación de Voluntarios de Protección Civil serán obxecto de valoración polos procedementos que se establezan nas correspondentes instrucións de desenrolo deste Regulamento. Distinguiranse como proceda as condutas meritorias e sancionaranse, de conformidade co establecido neste Regulamento, as infraccións ao previsto no mesmo.

A valoración corresponderá ao Concelleiro Delegado de Protección Civil a proposta do Xefe da Agrupación.

As recompensas e sancións anotaranse no expediente persoal do interesado.

Artigo 26º.-

As accións meritorias que impliquen un nivel de adicación superior aos deberes ordinarios do Servizo ou riscos para a vida ou a integridade dos voluntarios, poderán ser recompensadas co recoñecemento público mediante o correspondente escrito da Alcaldía ou a formulación pola mesma de proposta para a concesión da Medalla ao Mérito da Protección Civil creada a tal efecto pola Xunta de Galicia, e outras distincións que poidan concedelas distintas administracións Públicas ou o Concello, no seu caso, para premiar actos desta natureza especial.

Artigo 27º.-

As infraccións ao disposto neste Regulamento sancionaranse previa a tramitación do correspondente expediente.

Non se poderá impoñer sancións sen audiencia do interesado.

As faltas considéranse leves, graves ou moi graves.

1. Estimaranse como faltas leves e sancionaranse co apercibimento ou suspensión de ata un mes, atendendo ás circunstancias que concorran, as seguintes:
 - a. O descoido na conservación e mantemento do equipo e material que tivera ao seu cargo no cumprimento das misións encomendadas.
 - b. A desobediencia aos mandos do Servizo, cando elo non supoña mal trato de palabra e obra e non afecte ao Servizo que deba cumprirse.
 - c. As demais infraccións ou omisións, con carácter leve, ao presente Regulamento.



CONCELLO DE BEGONTE

2. Consideraranse faltas graves e sancionaranse con suspensión dende un a seis meses, atendendo ás circunstancias que concorran, as seguintes:
 - a. Negarse ao cumprimento das misións que lle sexan encomendadas sen causa.
 - b. A utilización fora dos actos propios do servizo do equipo, material e distintivos de Protección Civil.
 - c. O deterioro por negligencia, perda do equipo, material, bens e documentos do Servizo o seu cargo e custodia.
 - d. As omisións ou infraccións graves ao preceptuado neste Regulamento e en particular ao seu artigo 10º
 - e. A acumulación de tres faltas leves.
3. Serán causa de expulsión, como consecuencia de falta moi grave, as seguintes:
 - a. Deixan de cumprir, sen causa xustificada, as esixencias do servizo.
 - b. Observar mala conduta ou haber sido sancionado reiteradamente por faltas graves.
 - c. Ser condenado por calquera acto delictivo excepto das condenas derivadas de accidentes de circulación.
 - d. Utilizar ou exhibir indebidamente as identificacións do Servizo.
 - e. A agresión de palabra ou obra a calquera membro do Servizo e a desobediencia que afecte á misión que deba cumprir.
 - f. Negarse a cumprir as sancións de suspensión que lle foran impostas.
 - g. O incumprimento moi grave do establecido no presente Regulamento e en especial do seu artigo 10º.

CAPITULO VI

RECISIÓN DO VÍNCULO COA AGRUPACIÓN

Artigo 28º.-

A relación de colaboración voluntaria co Concello terminarase a petición do interesado, por falecemento do mesmo, declaración de incapacidade, solicitude de baixa temporal ou definitiva, perda da condición de veciño ou quedar incurso en situación de inhabilitación para o exercicio de cargos públicos por sentenza firme.



CONCELLO DE BEGONTE

Artigo 29º.-

Considerase baixa temporal na Agrupación de Voluntarios de Protección Civil a suspensión da actividade na mesma como consecuencia de sanción, a ausencia inferior a tres meses que teña motivos xustificadas que forma comunicada oportunamente, así como a interrupción da prestación pola incorporación ao Servizo Militar ou por embarazo, atención de recen nacido ou enfermidade.

Artigo 30º.-

Será causa de baixa definitiva na Agrupación a petición do interesado e a incomparecencia do mesmo por tempo superior a tres meses, sen causa xustificada, á actividade ordinario ou especial que lle corresponda; o incumprimento dos servizos mínimos esixidos no artigo 20 ou a negativa a cumprir-lo requirimento da prestación de actividade nunha zoa sinistrada determinada ou a permanecer na mesma no posto que se lle encomende.

Artigo 31º.-

Acordada a baixa e notificada ao interesado, por este procederáse á inmediata entrega da documentación de identidade, distintivo, uniformidade, equipo e material que lle fose adxudicado polo Concello.

Artigo 32º.-

En todo caso expedirase, a petición do interesado, un certificado no que consten os servizos prestados na Agrupación de Voluntarios de Protección Civil e a causa pola que se acordou a baixa.

DISPOSICIÓN FINAIS

PRIMEIRA:

Pola Alcaldía, Concelleiro Delegado de Protección Civil ou funcionario con misións equivalentes ás deste, ditaranse as instrucións e directrices que sexan necesarias para o desenvolvemento e aplicación deste Regulamento.

SEGUNDA:

Este Regulamento entrará en vigor despois da súa publicación íntegra no Boletín Oficial da Provincia, e unha vez transcorrido o prazo o que se refire o artigo 70 en relación co 65.2 da Lei 7/85, de 2 de abril.



CONCELLO DE BEGONTE

DISPOSICIÓN TRANSITORIA

O contido do presente Regulamento considerarase provisional e, en consecuencia, adaptaranse ás normas que procedan das Leis que regulen, no seu día, o Servizo Civil e a Protección Civil, de conformidade co establecido nos números 3 e 4 do artigo 30 da Constitución e, no seu caso, por outras disposicións de carácter xeral do Goberno Central e da Xunta de Galicia.